



*Jumat, 15 Desember 2023*

**Ogen : Miha 1:1-9**



**Ngelawan Dibata Peturah Ceda Ate**



**D**ekahen ngada-ngada ku jah ku je la ertorosen, dekahen ngerana asangken erdahin erbahanca turah me kemusilen dingen ate mesui. Man kalak si nunut erdahin, makeken waktu alu payo erbahanca kegeluhenna sikap dingen tercukupi me kiniperlun geluh. Lit nge hukum sebab akibat. Kai siniibahan sada paksa mereken ulih.

Nabi Miha maba berita kerna kegeluhen bangsa Juda. Bangsa enda ngelawan Tuhan, ngeluh i bas dosa, nembah man dibata-dibata sideban, dingen ndatken barang-barang entah kinibayaken arah cara si la payo. Itundalkenna Dibata. Tole ibabaina kalak sideban papak, ibabaina bangsa Israel ngelawan Dibata dingen erdosa. Si enda kerina erbahanca turah rawa Dibata. Iruntuhkan Dibata me Samaria jadi gungunen batu i mbalmbal. Dosa Samaria seh buena e maka ikataken Mika "lanai terpepalem," kecedan ate jadi ukumen si man alanken. Ukumen si isehken Dibata e nuduhkensa maka Dibata e adil. La ia nggit iduaken bangsaNa. Si jagat e tetap jahat ras arus iukum. Aminna pe e bangsaNa jine.

Adi nulih kita ku bas padan Si Mbaru si inget pe uga Iblis make erta e guna ncubai Jesus. Kerina erta banci ibereken tapi arus nembah Jesus man bana. Tawaren enda itulak Jesus erkiteken si pantas man sembahen Dibata kap ngenca. La terjeng si e, arah kotbah Jesus pe ngataken maka kalak si mabai kalak sideban papak e me si la mehergana i bas kinirajan Surga (Bd. Mat. 5:19).

Arah kata enda mari dage si kontrol dirita ula sempat ndabuh ku bas dosa si bage rupana. Dibata e cukup kap mereken kai siperluken kita, e maka ula kel erdua ukur man baNa. Bas mereken pengajaren metengetlah, ula sempat erlawanen ras Dibata. Si nggeluh ndalanken sura-sura Dibata ndatken erbage kemalemen ate.

*☞ "Adi ateta dame ula ngelawan Dibata"*



